




Literatura den Bon Dia

Ernesto E. Rosenstand



COMPANASHI

Cronica di recuerdonan scondi

Ma den curso di tempo esaki tambe a bira menos dor di cu economia tabata bai atras. Tur esaki a resulta despues den un situacion economico basta caotico, cu a crea problemanan grave na e region. Hendenan a cuminsa perde nan trabou. Pueblo no tabata spera esei.

Loke a haci e klap mas fuerte. Y awo atrobe hendenan a cuminsa bai otro caminda unda lo nan por a biba miho. Emigracion grandi a cuminsa. Migracion Caribense a bolbe cuminsa buscando miho porvenir.

Nan tabata sinti e cambio tabata bin. Nan no kier a keda pasa trabou. No solamente na Santa Marta, ma tambe otro partinan a cuminsa sinti esaki.

Poco poco economia a cuminsa bin abou. Principalmente den henter zona bananera. Tur hende a cuminsa experiencia esaki. A kere cu esei lo no dura hopi y cu lo bin “tiempos mejores.” Ma esei no tabata e caso. Al contrario!

Pobresa a cuminsa dreña na varios parti unda cu un tempo cosnan no tabata di e malo ei. Y na unda si tabata malo a bira pio. Y loke tabata pio tabata cu criminalidad a cuminsa crece. Hortamento tabata “al orden del dia.” Nan ta haya e prome slanan. Esaki ta e caso den tur crisis.

Y zona bananera no tabata excepcion. Poco poco e bonansa a cuminsa bira menos y a bin caba por completo durante di Dos Guerra Mundial, cu a percura pa barconan cu tabata transporta e fruta aki no por a navega pa Europa o Merca sin core riesgo di ser torpedea pa submarinonan Aleman, cu tabata operando den Caribe.

Y esakinan tabata varios. Pa por a evita e atakenan aki e barconan tabata navega den convoy. Esaki mes tabatin su riesgonan grandi. E riesgo a bira asina grandi y mercado a cai fuertemente cu e compania a dicidi pa haci su operacionnan hopi menos.

Tur hende por a ripara esaki. Menos trein tabata core. Nan no tabata transporta di e hopi banana mas. Y nan no tabata core cu hopi frecuencia.

Plantacionnan tambe a cuminsa bai atras. Pakico percura pa e plantacionnan aki sino tabatin benta pa e producto. Y poco poco nan a keda sin ningun clase di atencion.

Consecuencia di tur esaki tabata cu den varios caso nan a bira un ruina completo. E bunita plantacionnan a cuminsa cambia den terenonan habri. Un bista tristo! No tabatin di e hopi pedido. Y bo tabata ripara esei tambe na waf dor di cu masha poco cacho tabata resta.

Y pueblo no tabata haya oportunidad pa hiba esakinan cas, manera tabata custumber. Tempo di bonansa e cachonan cu tabata resta hendenan por a

hiba nan nan cas, unda cu nan tabata usa esakinan na tur manera.

Despues di a carga e barconan bo tabata mira for di tur parti hende ta bai waf bai busca nan cacho di bacoba cu a resta. Tur hende por a coi cuanto cu nan tabata kier.

Den rij nan tabata cana y tabata duna bo impresion di frumiganan cu ta hiba cuminda nan cas. Den alimentacion di e pueblo bacoba tabata hunga un papel importantísimo.

Dor di duna e pueblo e cachonan waf tabata keda bashi. Esaki pues tabata un manera pa deshaci di nan. Sin ningun gasto y di biaha tabata tene pueblo contento. Y bacoba tabata ser usa masha hopi como alimento. For di nan nan tabata sa saca masha hopi cos. Hende pover ta hopi inventivo.

Di e poco cu nan tin nan ta saca masha hopi mes, pa di e manera ei nan por sobrebibi. Y cu bacoba nan tabata haci esaki tambe. Nan tabata saca for di dje hariña pa traha papa te dushi di bacoba ora esakinan tabata hecho. Nada tabata bai perdi. Necesidad ta haci hende hopi creativo!

Pues den tur sector a sinti cosnan tabata bai atras. Anto cu velocidadnan asombroso. Den bida di tur dia a cuminsa mira cu stranheronan a cuminsa move. Nan no tabata mira ni p'ariba ni p'abou. Nan no kier a keda pasa trabou na un tera extraño.

Y asina cosnan a cuminsa pinta malo nan a move. Algun di nan a bai bek bon para. Esakinan tabata esunnan cu a sabi di spaar, cu a reconoce balo di e placa cu nan a gana. Nan a usa nan cabes.

Esakinan tabata principalmente esunnan cu tabata traha na e compania. Nan a bin pa gana cen. Muchanan cu tabata haya hopi cen dor di sambuya placa cu matrosnan di barco tabata tira den lama no tabata haya esaki mas.

Consecuencia di esaki tabata cu ladronicia a cuminsa crece. Mester a haya placa unda cu ta. Esei dor di cu nan tabata custumbra di tin basta cen y di un pa dos esei no tabata e caso mas.

Den tempo di bonansa nan tambe a sa di provecha. Ta hopi tabata bai waf pa sambuya placa cu e matrosnan tabata tira den lama. Ma esaki tambe a caba, mescos cu e bida na e caya unda tabatin masha hopi prostitucion. Poco poco “districto rojo” a cuminsa desaparece.

El a bira shinishi. Lusnan di colo a bira menos. E glamour di e bario a cuminsa bai perdi. No tabatin e hopi desorden di antes. Y e mohenan a cuminsa desaparece di ei banda. Nan no tabata haya e cantidad di cliente cu un tempo nan tabata custumbra di haya.

Y cu tabata paga bon, pasobra e temponan di bonansa placa tabata core ni e riu Manzanares cu tabata pasa banda di e stad. Matrosnan tabata paga bon. .